

Construccion di prome Facilidad Multifuncional ta cuminsa otro luna

ORANJESTAD – Facilidatnan Multifuncional of Multi Functioneel Accommodaties (MFA), ta un concepto existente na Hulanda, caminda ta pone diferente tipo di servicio bou di un solo dak pa asina haci e bida di e ciudadano, den e bario ey, mas facil y agradable. Gabinete Mike Eman I a anuncia cu ta reemplaza e cinco Hulpbestuurskantoor existente, cu e facilidatnan aki, di cual e prome na Noord ta bay cuminsa su construccion den luna di februari proximo.

Ta bon pa accentua cu ademá di haci e tramite di documento y pago di servicionan mas facil, e MFA'nan rond Aruba, tambe tin e tarea esencial di promove y facilita participacion y interaccion social di e ciudadanonan den e comunidad en cuestion. Cu esaki kier men, cu cada Facilidad Multifuncional ta busca pa converti den un punto di encuentro pa topa cu hendenan di e bario y asina bin cu actividadnan educativo, recreativo y social pa tur edad.

E cinco edificio di MFA na Aruba ya ta diseña pa arkitectonan Arubiano y nan ubicacion ta conoci. Cada un tin un estructura y aspecto moderno teniendo na cuenta tur e servicionan cu mester ofrece comunidad. Aki ta



papia di un departamento di gobierno, servicionan publico y priva. Ciudadanonan di Noord, Paradera, Santa Cruz, Savaneta y San Nicolas por acudi na nan respectivo MFA pa sea busca papel di 5 Florin di Censo, paga recibo

di awa, coriente of telefon y tambe haci uzo di internet, sala di reunion, etc. Adicional e edificacionan di MFA tambe tin e responsabilidad di ta sostenibel pa no afecta e medio ambiente. Cada MFA na Aruba tin aspectonan cu

ta haci'e 'Green'.

Ademá di nan aspecto funcional, Gabinete Mike Eman II tin un vision specifico tras di introduccion di e Facilidatnan Multifuncional den cada distrito. E edificio mester ofrece algo adicio-

nal na e comunidad. Esaki ta bin den forma di luganan manera cafeteria, biblioteca y diferente espacio paden y pafo cu ta sirbi pa recreacion social, teatral y musical. Di e forma aki ta crea e posibilidad pa hendenan por topa otro y asina aki trece e bario mas hunto y crea e cultura di antes caminda tur hende ta conoce otro y ta wak pa otro su bienestar pa medio di actuacion boluntario.

Un sociedad cu personanan cu ta mas pro-social y caminda actonan boluntario ta forma parti normal di e bida diario, ta un sociedad mas fuerte y exitoso. E vision di e Gabinete Mike Eman II ta pa brinda nan e espacio y hermentnan necesario pa nan ta mas activo y efectivo y stimula e cultura comunitario den e siguiente generacionnan.

E comision trahando riba e desaroyo y ehecucion di e Facilidatnan Multifuncional na Aruba ta consisti di Omar Harms, Anky Vrolijk y Harm v/d Seijp. Nan a duna di conoce cu den luna di februari 2014 ta cuminsa cu construccion di e prome MFA den e bario di Noord riba e tereno entre Centro di Bario y Warda di Polis. Su tras lo sigui e edificacion di Paradera y Savaneta y pa termina cu Santa Cruz y San Nicolas. □